

Distgargar las vischnancas cun centers d'asil

La regenza respunda a l'incumbensa parlamentara da deputada Elisabeth Mani-Heldstab (pbd Tavau)

DA MARTIN CABALZAR

■ Per cuvrir ils custs supplementars che sa resultan per vischnancas cun centers collectivs d'asil sco Cazas, Cuir, Tavau e Schluein paja il chantun actualmain tut en tut ina pauschala da maximal 100 000 francs. Tenor la deputada burgais-democratica Elisabeth Mani-Heldstab (Tavau) na tanscha quai dentant betg. Tenor la deputada da Tavau ston las vischnancas pertutgadas numnadain purtar tut ils custs da quels umans che han survegnì il status da fugitiv da la confederaziun. Quels fugitivs reconuschids che n'abiteschian betg pli en centers transitorics per requirers d'asil, mabain stoppian vegnir integrads en la societad. Quai chaschunia a las vischnancas pertutgadas blers custs administrativs en connex cun la tschertga d'abitaziun e da lavur. Quel aspect n'haja la regenza betg resguardà en sia resposta, punctuescha Elisabeth Mani.

Empermischun betg ademplita

En connex cun ils centers transitorics per requirers d'asil saja vegnì empermissa a las vischnancas pertutgadas ch'ellas na stoppian betg surpigliar t'gargas finanzialas supplementaras pervi da questa incumbensa speziala. En connex cun la refurma da la gulivaziun da finanzas haja la regenza dentant betg tegnì questa empermischun, pretenda Elisabeth Mani.

Sche singulas vischnancas ston supportar grevezzas finanzialas smesiradas perquai ch'ellas ston procurar per la collocaziun conceda la regenza a quellas bain ina gulivaziun finanziaria. Questa gulivaziun subsidiara vegn dentant mo applitgada sche las grevezzas na pon betg vegnir cuviridas autramain sco per exempel entras la gulivaziun da las grevezzas. Sa basond sin la nova ordinaziun valan grevezzas sco smesiradas sche las expensas necessarias han per consequenza ch'i



La regenza è pronta d'examinar soluziuns respectivas per distgargar anc pli fitg vischnancas cun centers d'asil sco qua a Schluein.

FOTO O. ITEM

sa resulta in augment d'almain 10%. Gulivadas vegnan mo $\frac{3}{4}$ da las grevezzas. Ils pajaments supplementars empermiss per l'instrucziun per uffants da lingua estra vegnan tenor la nova missiva cum-pensads cun la reduziun da la pauschala per la scola regulara da 20 a 14 per-tschient. Quai na saja en nagina maniera ina distgargia per las vischnancas pertutgadas, insista deputada Mani.

Consequenzas dal recurs da Laax

Tenor Mani ha il recurs cunter il nov center da requirers d'asil prevì a Laax gi per consequenza ch'il chantun sto puspè turnar ad avrir il center transitori a Tavau che era gia vegnì serrà. En il fratemp è quel vegnì dà en sutlocaziun a la vi-

schnanca da Tavau perquai ch'i dovrà il spazi d'abitar per fugitivs reconuschids.

En il senn da l'empermischun dada oriundain resguardan ils 28 consegnants da l'incumbensa Mani sco in fatg gist e raschunaivel ch'il chantun stgaffescha uss ina basa legala per che questas t'gargas finanzialas supplementaras da las vischnancas pertutgadas possian vegnir cuviradas. Quai independentmain da la refurma da la gulivaziun da finanzas.

La regenza respunda

En sia resposta a l'incumbensa Mani accentuescha la regenza ch'ella haja menziunà gia il zercladur 2013 che las vischnancas stoppian surpigliar t'cherts

custs che pon vegnir chaschunads da requirers d'asil sco er da personas admesas provisoricain. La legislaziun vententa fixeschia che mo custs supplementars excessivs da las vischnancas possian vegnir indemnisads cun pajaments da gulivaziun. Actualmain na vesa la regenza betg la necessitad da crear ulteriuras stipulaziuns legalas.

La contribuziun pauschala da 100 000 francs per las 4 vischnancas pertutgadas duai cuvrir ina part dals custs supplementars ed il medem mument gidar a chattar alloschis collectivs per collocar requirers d'asil. Plinavant duai questa contribuziun era tegnair quint d'ina repartiziun equilibrada entaifer il chantun. Il giavisch dal chantun

saja era quel «da collavurar cun las vischnancas en ina moda e maniera consensuala e cooperativa per ch'ils alloschis d'asil possian vegnir manads vinavant cun success e senza fricziuns», scriva la regenza.

Nova gulivaziun porta distgargia

La regenza è persuadida che cun la gulivaziun da las resursas ch'il Grischun prevesa en sia refurma da la gulivaziun da finanzas vegnia la problematica mitigada considerablain. Quella resguarda adequatmain la situaziun speziala da las vischnancas cun ina gronda quota da persunas en il process d'asil. Per eruir il dumber d'abitants d'ina vischnanca vegnia resguardada a partir da 2010 la populaziun residenta permanent. Uschia vegnian las quatter vischnancas numnadas distgargiadas considerablain cur che la refurma da la gulivaziun entra en vigur.

Tenor il nov concept federal duain las structures da collocaziun vegnir organisadas sin plaun federal «a moda vasta ed effizienta e las decisiuns da spedita duain vegnir exequidas consequentmain». Uschia duain la confederaziun, ils chantuns e las vischnancas da staziunament vegnir distgargiads considerablain ed ils requirers d'asil duain survegnir lur decisiun uschè spert sco pussaivel. Tge consequenzas che questa restructuraziun dals fatgs d'asil vegnan ad avair per il chantun Grischun na possia però anc betg vegnir giuditgà a moda definitiva, scriva la regenza.

Per il mument na saja perquai betg raschunaivel e prudent da stgaffir ina nova basa legala per cuvrir ils custs supplementars che s'erresultan per las vischnancas pertutgadas. La regenza saja dentant pronta d'examinar soluziuns respectivas per eventualmain distgargar anc pli fitg las vischnancas pertutgadas sche quai sa mussia per necessari.